

## ■ COLUMNA

# Per plaschair surrir!

DA PIEDER CAMINADA

**A**vant prest trais decennis hai jau pers mes surrir d'in di a l'auter. Betg perquai ch'i fiss i mal cun mai. Na, il cuntrari, i gieva cun mai perfin fitg bain, ma mia fatscha na vuleva tuttenina betg pli surrir. Na pudeva betg pli surrir. Sche jau guardava en il spievel ma tgittava encunter ina fatscha bain enconuscenta, ma ella na veseva betg ora propi sco la mia. Almain betg sco quella che jau aveva en regurdientscha.

**T**ge era capità? Be in pitschen incap. E l'istorgia latiers va uschia: Mia barba plaina da lez temp era creschida uschè ferm che jau hai exnum stuì tunder ella per betg derasar tema e sgarschur tar mes concarstgauns. Perquai che jau n'hai betg fatg attenziun durant tunder, hai jau taglià ina largia talmain gronda en mia barba spessa ch'i deva be pli ina soluziun: coup radical! Ed uschia hai jau taglià giu mia barba plaina totalmain per l'emprima giada suenter blers onns. Jau aud anc oz ils sbratgs spaventads da mias duas figlias, cura che jau sun vegnì cun fatscha niva or dal bogn. E mia dunna ha bunamain gì fadia da trair flad a forza dal rir.

**T**ut quai n'è naturalmain betg stà uschè nausch – era sche jau ma sun grittentà pulitain pervia da mes malinschign.



La fin finala era mia barba daventada in da mes segns distinctivs sur tut ils onns. Na, propi nausch èsi stà che jau n'hai plirs dis betg pli pudì surrir endretg. Igl era sco sche jau avess sprizà botox per far svanir mias faudinas. Mia musculatura da la fatscha era en il vair senn dal pled «sa durmentada». Jau aveva senza far stim smess da surrir enturn la bucca. Davos la barba plaina spessa n'avess oramai nagin vesì quai.

**Q**uai che be purtaders d'ina barba plaina han gia experimentà enfin oz, pudess uss era capitar a l'entir pievel: l'emblidar collectiv dal surrir. Bun, intgins vegnan a dir ch'ils Svizzers na sajan oramai betg in pievel da surriders e surridras – memia severs e malcuntents gajan els tras la vita. Tgi che na vul betg vesair quai duai ina giada studegiar las fatschas dals cunpassagiers en il tren ubain en il tram. Fatschas surrientas vesan or auter.

**D**a quest punct da vista ha l'obligatori da purtar mascrinas en blers

champs da nossa vita senz'auter era ses bun. Ins n'è betg pli sfurzà da guardar quant mal che la gliued sa senta gist il mument. E tuttina na duessan nus betg prender a la leva las vairas varts negativas da l'obligatori da mascrinas. As imaginai ina giada quant desperada che la vita fiss sche nagin na surriess pli, perquai che tuts avessan, pervia da las mascrinas, emblidà co ch'i va da surrir.

**M**a nagina tema. Nus na vegnin betg ad emblidar il surrir. Pertege cuntrari al purtader d'ina barba plaina po il purtader u la purtadra d'ina mascrina adina puspè prender giu la cuvrida da la fatscha – ed uschia adina puspè exercitar il pli bel surrir. Abstrahà da quai pon ins era surrir be cun ils egls. Empruvai quai ina giada davant Voss spievel – natiralmain cun ina mascrina en fatscha. Voss surrir dals egls vegn ad intgantar Vus! E sche Vus guardais bain, vegnis Vus perfin a vesair co che Vossa entira fatscha surri sut la mascrina. Quai fa bain a l'olma. Ed almain a quai na vulain nus betg renunziar – cun ni senza corona.

**\*Pieder Caminada è mainaproject scolaziun e redactor tar la «Südostschweiz». El è creschi si a Glion en ambient per gronda part tudestg e viva oz en il vitg rumantsch da Castisch.**

**\*\*La convivenza da las linguas e culturas – quai è il tema da las columnas che cumparan sut il titel «Convivenza» e che vegnan publicadas mintga glindesdi en la Südostschweiz ed en La Quotidiana.**